

漢魏六朝百三家集

梁

第六十九冊

梁元帝

新學
和聲

PDG

論

全德志論

物我俱忘。無貶廊廟之器。動寂同遣。何累經綸之才。雖坐三槐。不妨家有三徑。但接五侯。不妨門垂五柳。使良園廣宅。面水帶山。饒甘果而足花卉。葆筠篁而玩魚鳥。九月肅霜。時饗田畯。三春捧繭。乍酬蠶妾。酌升酒而歌南山。烹羔豚而擊西缶。或出或處。竝以全身爲貴。優之游之。咸以忘懷自逸。若此衆君子。可謂得之矣。

鄭衆論

漢世銜命匈奴。困而不辱者。二人而已。子卿手持漢節。臥伏冰霜。仲師固無下拜。隔絕水火。况復風生稽落。日隱龍堆。翰海飛沙。皐蘭走雪。豈不酸鼻痛心。憶雒陽之宮陛。屑泣橫悲。想長安之城闕。直以爲臣之道。義不爲生。事君之節。生爲義盡。豈望拔幽泉。出重仞。經長樂。抵未央。及還望塞亭。來依候火。傍觀上郡。側眺雲中。雖在已之願。自隆而於時之報。未盡。

議

高祖武皇帝謚議

臣聞翼善傳聖曰堯仁聖盛明曰舜受禪成功曰禹除虐去殘曰湯謚者行之跡號者功之表雖賤不誅貴卑不誅尊而彰乎名者盛德之嘉號也。被於物者治定之實錄也。斯所以聲明煥乎鍾石昭晰備於絃管者焉。伏惟天縱欽明惟睿作聖功超三五聲踰七十仰之彌高就之彌遠載潛載躍乃武乃文先是木運告終羣后改

屬。乾維罔構。地紐如崩。祧紀阡危。公卿肝食。九
牧有淪胥之悲。八表興橫流之歎。乃凝威黑水。
表瑞丹陵。雲合景從。表裏禔福。受終文祖。允恭
克讓。知黔首不可以無歸。蒼生不可以無主。降
汾陽之遠志。不得已而臨之。於是類帝禋宗。革
命創制。禘郊式展。殷薦斯潔。臨茲大寶。化與和
氣俱宣。扇此王風。政與秋霜並肅。言懸日月。功
格區宇。不以紫宸爲貴。不以黃屋爲尊。政謚刑
措。民殷國阜。虹旌式卷。堡燧載清。胥豕相因。環

楷無曠。天衢亨泰。王道升平。南海候風。東溟奉
貢。膏露凝枝。慶雲觸石。山開蒼壁。地出玄珪。驃
騎把鉞。則休屠款塞。太尉抗旌。則名王蹙角。聲
教所漸。浹靈蛇之都。威令所行。通燭龍之外。開
庠建序。布濩於成均。正俗移風。氛氲於司樂。虛
納十亂。引諒直之規。廣闢四門。弘招賢之德。青
衿知擊壤之性。黃髮恣鼓腹之歡。加以鑽味微
言。研精至道。文終所牧之典。史倚所讀之書。無
輟萬機。日且千遍。馳郁郁之聲。表乾乾之德。允

所謂皇哉。日用而不知者矣。方且告成岱嶽。鏤
升平之玉簡。昭事梁甫。秘禮首之金繩。而文王
明夷事。伴往冊。黃帝橋山痛深前典。萬有淪傷
三辰掩曜。人祇軫慕。山海含悲。慟切陟方。哀深
遏蜜。煩冤荼毒。貫切心髓。風樹不靜。陟岵何期。
思所以欽若九功。仰稽七德。

序

簡文帝法寶聯璧序

竊以觀乎天文、日月，所以貞麗；觀乎人文、藻火，所以昭發。况復玉毫朗照，出天人之表；金牒空解，生文章之外。雖境智冥焉，言語斯絕；詠歌作焉，可略談矣。粵乃書稱湯誥，篇陳夢說。昔則王畿居亳，今則帝業維揚。功施天下，我之自出。豈與姚墟石紐、譙城溫縣，御龍居夏，唐杜入周而已哉。皇帝垂衣負屨，辨方正位，車書之所會同。

南暨交趾風雲之所沾被西漸流沙武實止戈
秉宜生之劒樂彰治定減庖犧之瑟相兼二八
知微知彰將稱四七如獵如虎甯俟容成翠屋
之遊廣成石室之會故以宗心者忘相歸憑者
常樂昔轉輪獲法南宮有金龍之瑞梵天請道
東朝開寶蓋之祥盡善盡美獨高皇代古者所
以出師入保冬羽秋籥實以周頌幼冲用資端
士漢盈末學取憑通議大傳之論孟侯小戴之
談司業山川珍異俟郊迎而可知帷幄後言籍

墾田而求驗。以今方昔事則不然。我副君業邁
宣尼。道高啓筮之作聲。超姬發。甯假卞蘭之頌。
譬衡華之峻極。如渤海之波瀾。顯忠立孝。行修
言道。博施尚仁。動微成務。智察舞雩。爰分封蟻。
爰初登仕。明試以功。德加三輔。威行九流。董師
虎據。操鉞蟬冕。津鄉沈濟。物仰平分之恩。沂岱
叩岷。民思後來之政。陳倉留反裘之化。淮海高
墨。幘之聲威。漸黃支。化行赤谷。南通舜玉。北平
堯柳。朝鮮航海。夜郎款塞。然後體道方震。雨施

雲行漢用戊申。晉維庚午。增暉前曜。獨擅元貞。
恩若春風。惠如冬日。履道爲輿。策賢成駟。降意
韋編。留神緇帙。許商筭術。王圍射譜。南龜異說。
東馳雜賦。任良奕碁。羨門式法。箴興琴劍。銘自
盤盂。無不若指諸掌。尋涇辯渭。重以鳳艷風飛。
鸞文飈監。纖者入無倫。大者含元氣。韵調律呂。
藻震玄黃。豈俟取讚彥先。詢聞雅主。至於鹿苑
深義。龍宮奧說。遠命學徒。親登講肆。詞爲憲章。
言成楷式。往復王粲。事軼魏儲。酬答蔡謨。道高

晉兩似懸鐘之應響。猶衢尊之待酌。率邇者踵
武。逖聽者風聲。是使金堅閉法寶。冥久夢無懷。
不滅華胥夜感。自非建慧橋。明智劍。薰戒香。沐
定水。何以空積忽微。塵賢劫而終現。黍累迴幹
蘊珠藏而方傳。加以大秦之籍。非符八體。康居
之篆。有異六爻。二乘始闢。譬馬傳兔。一體同歸。
棄犀崇象。潤業滋多。見思平積。本有凝邈。了正
相因。雖談假續。不攝單影。卽此後心。還蹤初焰。
俱宗出倒。蓮華起乎淤泥。竝會集藏。明珠曜於

貧女。性相常空。般若無五時之說。不生煩惱。涅槃爲萬德之宗。無不酌其菁華。撮其旨要。採彼玳鱗。拾茲翠羽。潤珠隨水。抵玉崑山。每至鶴關旦啓。黃綺之儔朝集。魚燈夕爛。陳吳之徒晚侍。皆仰稟神規。躬承睿旨。爰錫嘉名。謂之聯璧。聯含珠而可擬。璧與日而俱升。以今歲次攝提。星在監德。百法明門。於茲總備。千金不刊。獨高斯典。合二百二十卷。號曰法寶聯璧。雖玉杯繁露。若傍蒹葭。金臺鑿楹。似吞雲夢。繹自伏櫪西河。

攝官南國。十迴鳳瑄。一奉龍光。筆削未勤。徒榮
卜商之序。稽古盛則。文慙安國之製。謹抄纂爵
位。陳諸左右。

使持節平西將軍荊州刺史湘東王繹年二十
七字世誠

侍中國子祭酒南蘭陵蕭子顯年四十八字景

散騎常侍御史中丞彭城劉漑年五十八字茂

灌

散騎常侍步兵校尉東官侍南琅邪王修年四
十二字彥遠

吳郡太守前中庶子南瑯邪王規年四十三字
威明

都官尚書領右軍將軍彭城劉孺年五十五字
孝穆

太府卿步兵校尉河南褚球年六十三字仲寶
中軍長史前中庶子陳郡謝儵年四十五字國
美

中庶子彭城劉遵年四十七字孝陵

中庶子南瑯邪王穉年四十五字孺通

宣城王友前僕東海徐喈年四十二字彥邕

前御史中丞河南褚灃年六十字士洋

北中郎長史南蘭陵太守陳郡袁君正年四十

六字世忠

中散大夫金華宮家令吳郡陸襄年五十四字

師卿

中散大夫瑯邪王藉年五十五字文海

新安太守前家令東海徐摛年六十四字士績
前尚書左丞沛國劉顯年五十三字嗣芳
中書侍郎南蘭陵蕭幾年四十四字德玄
雲麾長史尋陽太守前僕京兆韋稜年五十五
字威直

前國子博士范陽張綰年四十三字孝卿

輕車長史南蘭陵蕭于範年四十九字景則

庶子吳郡陸罩年十八字洞元

庶子南蘭陵蕭瑱年四十字文啓